

## DI 07 Maurizio Sguaita

### La vus dla cuscienza.

Son passà in fianch 'na gesa, una gisiola da muntagna,  
là int l'aria, pugià sù 'n bricch, indua la vista la guadagna.

Che silensi, che bell fresch, in mess dal busch cunt l'aria fina,  
a guardala l'è tantu bèla, propi mè 'na cartulina!!

A ghè un' aria misteriusa, la smea quasi a una preghiera,  
che in silensi, 'dasi 'dasi, ti la reciti la sera.

Senta....adess a s'alsa 'l vent, tira un'aria pulida e fresca,  
nivli scüri sù int al ciel...da chì 'n po' farà tempesta!!

Ma 'l senté l'è lungh e scür, faró mia in temp a rivà a cà....  
guardi indré vers la gisiola...forse Lü m'uspitarà!!

Düerdi dasi cula porta...devi fin un po' sbassám....  
...una vus legera e smorta am disa : "vegna innai mè bell salám!!"

Suspetus im guardi 'n gir, ghe nissün dent la gisiola  
i g'ho fin un po' paüra mè 'n fiulín al prim dí da scola.

Porti i öcc a guardà int l' aria...mi...in gesa...l'è roba strana!!  
pica l'acqua già süi vedar...dla finestra una scalmana!!!

"Son stai chì par tanti ani, semp tacà chì sù sta crus....  
famm sentì cume ti preghi, famm sentì un po' la tó vus!!

I rispundi un po' stremì "i son bon pü da pregà....  
...hin tanti ani che i preghieri son pü bon da ricordá!!"

"Dai...fa gnenta...sta quaièt, i na podi fa anche senza...  
im cuntenti madumà d'ascultà la to cuscienza."

I sto citu, i banfi gnanca, i pensi a tüti i mè erur....  
...ma sta vus che la rimbumba lè la cuscienza o l'è 'l Signur?

La tempesta l'è finì, 'dess al sul al guarda indré,  
ciapi sù i mè dü strasc e m'anviàri sül senté.